

摘藻堂四庫全書薈要

集部

欽定四庫全書蒼會要卷一萬六千六百七十五

集部

懷麓堂集卷四十六

明 李東陽 撰

文稿二十六

誌銘

明故榮祿大夫後軍都督府都督同知芮公墓
誌銘

公諱成字仁和姓芮氏其先出大同之金山祖諱台哈布

哈元翰林學士承旨父諱博囉魁岸多智歸我聖祖暨

于文皇官至燕山左護衛正千戶千戶公之卒也太夫

人富氏已娠越三月生公既長而蔭為祀賴以不絕矣

公性明闡閑騎射正統甲子從恭順侯吳公北征擒敵

酋哈喇岱擢金吾左衛指揮僉事戊辰使衛拉特還進指

揮同知己巳復使衛拉特窘迫備至不受敵撓是年秋英

廟北狩公冒矢石得停

闕

在景泰間還京師繫詔獄

未幾見釋進指揮使甲戌征銅鼓諸蠻累功擢都指揮

使英廟復位念公舊勞時擢驃騎將軍後軍都督僉事
公統効武營命入朝侍衛賜蟒龍金鎧兜鍪天順辛巳
曹賊之亂公名載功籍進榮祿大夫都督同知賜以誥
命贈祖及考皆如其官祖妣某夫人妣富封太夫人成
化改元受命出鎮川蜀征山都掌招徠蠻酋以靖弗庭
焚山獮澤誅勦無算捷聞進右都督賞賚甚厚居數年
與都御史交劾復以都督同知罷鎮還京師癸巳復以
兵部薦命統禁兵入衛如故又三年成化丙申四月二

十五日乃卒年六十有七朝廷遣官諭祭命有司治葬事嗚呼公以遺孤起家千戶遂陟閩府歷累朝五十餘年內領宿衛外勤征伐使絕域鎮遠疆茂著勞効老而不懈可謂不忝厥祖矣子男五長昕次昂次某某公子昂以次當嗣卜以某月某日葬公通州富豪鄉欲得子銘乃以吾友曾吏部克明狀來請公嗜書史不近酒恂恂如書生蓋天性然也予得之吏部云銘曰為家西裔世勤帝家赫赫先公為國爪牙惟公桓桓忠腸義肝北

縛疆胡獻馘軍門奉使出辦雄詞海翻頓撼擊撞愈促
而軒有勤厥艱其倍百千人之逢時有屈而信先帝眷
公云亦勞止置之後軍俾統予士我皇載命于蜀之鄙
維蜀之鄙寇來如蟻公秉斧鉞公奮弓矢招柔讐強陽
闢陰弛鈞雷迅颺瞬息千里何以錫公金鏹文綺何以
報公俾督戎紀彼盈莫居載蹶而起惟公功名克與終
始公門巍巍公嗣纍纍既紹永緒亦懷令儀我銘公幽
百世不隳

明故封承直郎南京吏部主事潘公墓誌銘

東陽因吾友潘君時用獲見其族父興化君又因興化君獲聞其考善齋公之行則歎曰潘氏其可謂世德也已潘本杭族五代時徙括今為處州之青田代有顯者曾祖諱臺仲祖諱子山父諱鉞生公公諱沆字克明善齋其別號也公少涉家難避地農家得春秋左氏傳讀之終身不忘既又益涉經史尤溪陰陽諸家書公父之戍雲南也公時尚穉有以父書致者公從從兄湛往見

默不作一語其兄以為不慧易之公退乃獨往跪且泣
問起居狀甚悉歸血指寫書附之其兄聞之曰彼非吾
所測也公傷父死難書警語于日所出入以自屬每哀
憤涕泣入則強語笑以見母不傷其心冬夜潛以身溫
母被母詰知公所為慰止之後將寢必鑊其室公竊鑰
啟室母輒遽入止之母疾革公憂不知所出潛剖左股
肉內糜中以進居喪哀毀幾絕貧不能葬然賻不義致
輒辭弗受墓無廬舍巢于樹以居過者皆佇視感歎曰

真孝子也興化君舉進士嘗以南京所給半俸屬其友
項司務文祥市二幣以獻公公怒曰汝始仕何自致此
物是豈吾爾望者君數書自明實所得常俸不敢用非
義為辱公猶未解至以項書及故緘報公公乃信君既
拜南京吏部主事今天子登極上皇太后尊號以恩封
公承直郎南京吏部主事配王氏安人命下未至而公
卒是為天順某月日年八十有四某月日葬釣臺岡先
塋之左王安人雲和世族孝謹有淑行兩就官養自興

化歸卒于家為成化某月日年亦八十有四以丙申正月二日合葬子男三長權先卒次琴興化君也累官至知府博學高行為時名人次核出繼仲父海孫男琚早世次珙瑄瓚玼瑚公葬未有銘興化君來朝京師以趙荊州士英狀屬東陽曰某礮石山中久矣俟吾子銘追而內諸壙既行道聞王安人訃棄官歸治喪信來速銘謹按銘法考公行得其大者如此又聞公多才畧閩賊之亂諸郡瓦解賊據沙嶺銀冶守臣調湖州兵三百守

沐溪縣吏集鄉兵數十授之公謂衆曰賊衆我寡宜任
計不宜任力澄照僧自間道來受役宜用為鄉導引兵
向葦山前鋒人持一木鳴鼓以進擇地為戰建標山巔
縋籠燈其下伏兵于隘以伺賊賊至勿鬪列木距馬出
礮矢以衝其鋒鋒少挫其勢必走走且半則揭燈起伏
腹背夾擊當無遺者衆莫肯信後官兵果敗鄉里大擾
三載始定皆如公言銘曰體以親故寧毀弗顧君子不
敢以為過貧以義守寧棄可取君子不敢以為矯公德

實希公執不隳吁嗟乎今誰與歸

明故懷遠將軍錦衣衛指揮同知趙公墓誌銘
錦衣衛指揮趙公病革家君往視歸謂東陽曰平生故人如邦彥者三十年如一日可多得邪去年邦彥與吾論舊故凋落殆盡在京師者惟吾二人因對酒太息泣下今邦彥又舍我去吾何為其情耶是日公卒家君往哭之明日東陽既往又明日公弟錦衣衛鎮撫恭來請銘家君乃命作銘公趙姓諱能邦彥字也始代世官為

金吾左衛指揮僉使事繼領禁衛兼隸三千營典中軍
旗纛每退朝在步輦前導器宇魁岸英廟目屬焉天順
辛巳公以營籍從征廣南時懷寧侯孫鏜實總禁兵別
置官代公一日上顧問左右曰彼長身荷爪者安在鏜
以實對上怒責鏜曰此朕禁旅安得妄動鏜謝罪乃免
亟馳驛召公追至九江而還乃黜代者仍公舊任蓋有
意用之未暇也甲申今上登極公用兵部薦調僉錦衣
衛出入慎肅上下倚重屢奉勅旨其在都城督官糴修

城垣總中外衢巷隍塹諸水道事事並告集人亦弗擾
其在外藩勘晉趙二獄趙獄尤重連結寢廣公覈情據
法刑用不濫法家韙之丁酉夏五月上念公賢勞特擢
指揮同知數月卒公在官久宣召扈衛輒先貴近累賜
中秘書寶鏹文綺蟒龍佩刀諸時物無虛歲卒之明日
適賜蟒服中使已出聞公卒乃返上特遣官諭祭亦異
數云趙氏本永平遷安世族曾祖諱才興肇著戎籍祖
諱甫疾不任事以從子某代累官至副千戶戰死齊魯

山無子甫復以諸父繼用死事功遷指揮僉事考諱榮

代以恩遷同知既老致仕復以恩進階昭勇將軍累錫

誥命妣李氏配張氏皆封恭人公涉書史閑武事家居

孝養喪祭無違禮與亡弟義官廉及今鎮撫恭甚友廉

卒撫其孤如存時教子有法子魯侍儲衛游武學有名

家風孫男四皆少俊可愛人謂公有後矣公生某年卒

某年年五十有七葬昌平北望祖塋之次銘曰物貴重

厚於人亦然有躋必顛峭則弗完公居錦衣十有四年

持盈居寵不替益虔功名始終孰謂弗難生榮死嗟道
路有言人之毀譽不繫其權我辭或傳公死弗諼

文永嘉妻祁氏墓誌銘

成化丁酉秋九月文君宗儒使自永嘉緘書狀各一道
抵予其書畧曰吾妻卒于蘇州林將以覲事北上歸道
蘇且葬之已卜地于吳縣之藏金灣以明年三月某日
從事請吾子銘其狀畧曰吾妻姓祁氏諱慎寧吾鄉祁
彥和甫之女年十九始受聘比歸二十有二時吾母棄

養也久事吾父及繼母祇畏不懈食飲衣服必其手出家或致饋餉輒辭曰私饋非長者奉又不可獨啜將焉用此林出就學吾妻脫簪珥為筆札費及舉進士從上京師或謂其服食大朴者則曰吾儒家婦也固當爾且仕固亦以榮其家然鮮不以妻子之欲為身累累其身以及其家如親何吾為婦無他能不以口體累丈夫耳已而從官永嘉愈肅家政二子一女雖幼穉不遺窺外戶故林得盡力于官三年無內顧憂林之在永嘉也

念家君宦遊北方不得共朝夕圖迎養于家業未就無
以為計意時時不樂吾妻謂林曰君在官自不得顧私
養養吾責也請以二子歸治舊業為迎養地林感其言
遣歸未幾得疾三月二日卒年三十有二而已又曰婦
人而得正首丘彼亦幸矣然舅姑及夫皆遠處南北圖
養未遂竟以別死此其志亦可悲也予與宗儒交讀其
辭意不能無戚乃次第為序并系以銘宗儒多才有文
辭出宰鉅邑為兩浙稱首行且有旌錫之命命未及故

于茲墓獨書曰文永嘉妻云銘曰勤儉而專婦之恒兮
胡殫厥身而隕其成兮匪夫君則賢其誰使我銘兮

明故封承德郎戶部主事陳先生墓誌銘

景泰初東陽以童子奉詔入順天府學為諸生時益都
陳先生寔分教事殊見優遇俾得月朔望叅謁不與諸
儕輩同朝夕東陽既與先生子清同舉進士在朝籍先
生歷他郡歸田里不相見者餘二十年而竟不可作矣
清歸自大同還京師屬銘嗚呼先生之德東陽不敢忘

聞訃哀悼惟不克弔哭門下是憾銘吾職也其曷敢有
讓先生諱俊字廷傑其先臨川人國朝洪武初大父諱
有才避兵青州因留居益都父諱某不仕先生少岐嶷
以諸生舉正統辛酉鄉薦再上禮部得乙科拜晉州訓
導丁內艱去改順天令九載奏績翰林試經義吏部覈
所舉士皆應格書上上考擢河津教諭復以外艱去改
交城清拜戶部主事既考成績先生乃棄官就封承
德郎戶部主事家居十有餘年及見其子為郎中乃卒

年七十有二先生性質實耿耿不阿事親孝家雖貧猶
歲析所入俸為養喪居毀瘠兄弟有異論諭不能得取
必以讓鄉論歸之教務經術程式不弛然辭色溫巽即
之盎然可親其所造士領鄉薦者十餘人又多舉進士
有名績清尤勤慎有聲上下間蓋得諸家教尤多初先
生在乙科同進者多不屑教職至匿年規免或謂先生
先生不應卒無愠色比老竟得顯錫又耆壽多賢孫子
造物者固有定數人顧以私智毆之奚益哉先生生某

某沒某葬某原銘曰安其潛斂其有餘慶源所于于厥
身于厥子孫其流若奔吁嗟先生其永存

賀感樓先生妻王氏墓誌銘

東吳感樓賀先生美之喪厥配王氏且葬自述事狀遣
其子鄉貢進士恩上京師曰為我徵太史氏銘先生未
嘗面予得予文輒為終卷嘗聞諸吳士大夫恩曩在京
師亦嘗道先生意如此銘不得辭按狀王氏諱正江陰
農家女也賀本吳人感樓之大父大理評事諱賢尚為

江陰訓導留居江陰洪武間坐事死役子宗震纔八歲貧無家依女兄及舅氏比壯贅青陽鄉之薛氏王薛隣也故感樓聘焉時宗震復坐累籍蘇州衛為兵盡粥其田廬家益貧感樓壯不能娶婚于王氏王氏亦貧甚止餘空屋三四楹兩家食常絕殆不能朝夕感樓乃奉母及妻還吳僦屋以居感樓貧居能力學博涉書史用其初為童子師從者日衆歲時修帛頗足其饘粥儉不妄費稍懋遷為業銖存兩積積且富益儉節如貧時累四

十餘年闢畝崇屋給婚嫁為富人時感樓學已就為鄉
先達子恩舉南畿鄉貢第一有名而賀氏益根固感樓
所力致而經營拮据籌贏縮籍出入俾無廢闕者王氏
力也成化戊戌恩歸自京師王氏老且疾己亥二月五
日卒年六十有七矣感樓之言曰吾妻無他異能獨吾
貧時恒不免凍餒吾妻未常有怨恨色吾衣食才足吾
妻不為侈不為其貧吾弟不克自給又多子女吾妻能
順吾意常給予無恡色吾平生不信佛老及陰陽拘忌

吾妻亦遵用家政不吾拂也於戲貧能積積能守又能散迤塞困滯而不以流俗敗家法此皆人情所難況婦人哉子四某某孫男某某某月日葬吳縣先塋之側其地曰某原銘曰昏不禮迎其變也正有封在原其歸也全孰躋厥生孰壽厥死委身其間與命終始夫爾託之子爾續之幽堂有銘太史作之

明故奉政大夫修正庶尹河南按察司僉事尹

公墓誌銘

嗚呼公之葬有日矣匪予小子曷宜為銘公於東陽為師為父執為鄉先輩亦奚忍為公銘然非東陽誰知公者公尹姓諱進字時勉揚州江都人考諱某從戎府軍居京師家故貧公力學自振聰穎絕人書一再過輒成誦友有春秋秘義假者不能得則以屬公公往與奕間一閱已復置案上歸輒錄授之數日而畢景泰庚午公以父役應試用書經舉順天鄉薦登天順丁丑甲科拜戶部主事京庾有歲穀甚夥掾吏窮日夜計總日以呈

公尤精筭事一布籌輒取筆判曰差若干斛掾不服公教以捷法為部位使覆計之果然中官共事者駭服乃一聽公所為莫敢柷聲籍籍起儕輩間數年用吏戶二部薦擢河南按察僉事領南畿江北屯田事事不稱力公嘗曰今官患冗如河南某事某事皆專置以吾攝之足矣巡撫官知公才欲使鬻河南麥于淮以利官需公謂非國大體且未必利畫一以陳再駁再上辭氣剴切文義燦然巡撫亦名士得公議夜不能寢然亦竟不行

又有巡撫官欲薦公數年公言藩臬間有謂公者公愀然曰使其可薦則某不得與聞不可則不必言也巡撫亦竟薦公不報公九載成績當受遷別其寮曰我休矣入京移疾竟不至吏部或勸公出公曰吾蚤喪昆弟長子又死使吾生行死歸亦焉用彼為哉蓋自河南已為是言後愈執不變還京居室甫定僅二載而卒論者皆歎公之先幾云公風裁清操論議鏘聳重名檢尚意氣子視孤姪曲致恩義不遺故交不陵小官自鄉黨寮屬

無大小疏戚同稱為賢以公之才視天下殆無不可為者而竟止是嗚呼其尚忍言哉公子一某生某卒某東陽往哭又三日乃克銘十有九日執紼而從公于墓其地曰某村在京城東八里銘曰嗚呼先生有位與名不損厥盈于身則羸履艮于亨澤壅不行豈材弗能已焉哉嗚呼先生

明故封徵仕郎中書舍人劉公墓誌銘

公姓劉氏諱英字某永平遷安人高祖諱明道元禁軍

萬戶曾祖諱源祖諱允恭考諱麟隱居國朝洪武間有
司薦茂材以親老辭不獲至京師辭弗就任忤旨編籍
錦衣衛校尉行役使廣東公失怙甫七齡無他昆弟以
例紀錄于官弱歲乃就役事母溫曲致奉養出值嘉果
必懷歸遺母或遇諸市囊無錢輒解衣質之母病籲天
請代病遂愈孝稱其鄉尤重信義有張姓者貸不能償
以女自贖比還鄉別女有難色公亟命還女并衣褥予
之有喪不能舉者出求賻不得公聞之遣人覘其家餽

以金帛其人驚感問姓名不告也公恒曰吾蚤志問學
中縻世務子孫必有成吾志者指其子詢曰其在此乎
正統己巳八月公扈從北征歸被創疾甚十有一月某
日卒年五十有二詢既貴贈公徵仕郎中書舍人封其
配龔氏為太孺人太孺人應天鉅族處士某之女也明
淑精女藝及歸公躬執饋爨尤虔祀事夫無倦色公
之疾也焚香籲天如公事母時公卒諸子俱幼太孺人
力襄事舉無違度教子必申父訓夙夜勤瘁以享其成

蓋尊居樂養者三十餘年年八十有二乃卒子四人謹讓詢誥詢歷官鴻臚序班中書舍人今為禮部主事直文淵閣公既卒葬于城南三里河下馬社之原太孺人以某年月日合葬未葬十日詢具衰經奉狀詣予拜且泣曰先考葬無銘今吾母將合葬銘禮也詢不敢廢且懼潛德卒不白以重不肖之臯敢請太史氏銘予惕然感之乃為作銘銘曰都城之南原有穴公歸百里蛻汝骨山渾水靈閔不洩如木斯植久乃發神其相之若有

物公有令婦德與匹遺休在躬保終吉後三十年歸此室

明故封翰林院編修文林郎謝公墓誌銘

吾友謝君鳴治既遷翰林侍講念親老欲歸省于家顧為編修時嘗一歸近制非滿十載者不得告居常鬱鬱至夜不能寐今年期且及方具疏未上而文林公之訃至矣東陽辱鳴治為知己非苟涉欣戚者既走弔歸為不寧寢食者數日吏部郎中黃君世顯狀公行以鳴治子

興毅來徵銘東陽未獲拜公每從鳴治得言動狀知公

長者今已矣是惡敢不銘公讀書識理道承家世孝節

志圖不辱母趙節婦之寡公甫晬旁無伯叔兄弟稍長

克自奮立禮扞外侮屹然不為動節婦懲財召禍盡散

貲產家就落公畢力致養厚治喪祭人不見其貧有嚴

勝者感節婦之義後死不貳公禮事終身為義服且祔

祭之曰我子孫世世無忘嚴氏公自奉數儉雖被封錫

祿食僅僅益自節縮為義舉從弟世修以寶慶知府致

仕家居公與建會總亭于魯祖孝子墓側墓祭已則立
子姓讀所著宗範其中歲置敦彛會以合族別建祠堂
于新第之東置田若干畝以共祀事於是謝氏之孝義
隱然動鄉邑大夫士聞者咸相與慕悅為歌詠傳於時
謝氏世居台州黃巖縣南孝子諱溫良始遷桃溪桃溪
今分隸太平則為太平人公祖諱雍考諱乾公諱盾字
世衍別號見南居士封翰林院編修階文林郎配高氏
封孺人有內行子五長鐸鳴治字也次某某公生某某卒

某壽六十八初公考葬洋魯山公顧其右偏曰死葬我
於此鳴治歸卜用某月某日窆焉銘曰孝子錫類允惟
謝宗歷世中微其蕃然自公公生亦艱子立靡怙孰畀
全之公有貞母公壽且貴五子十孫天謂弗徵視此後
昆福有幸致利有苟射令名之下可以觀德

懷麓堂集卷四十六

欽定四庫全書薈要卷一萬六千六百七十六

集部

懷麓堂集卷四十七

明 李東陽 撰

文稿二十七

誌銘

金尚義墓誌銘

成化己亥閏十月七日金君尚義卒於遼陽庚子三月
其子祺祐道京師翰林侍講謝君鳴治率諸同年為文

寓祭其喪六月祺以喪歸至天津復走京師從順天府
經歷薛秉儀來請銘予比與鳴治悲君之死期各為文
以慰君地下鳴治既為傳予撮其大者為序及銘君金
姓諱忠字尚義處州麗水人乾州知州諱善之曾孫封
文林郎監察御史諱叔度之孫雲南按察僉事致仕諱
愷之子今開封府知府致仕尚德之弟少從按察公宦
遊廣東甫就學輒棄去商販蘇松間年二十見其兄舉
進士復奮就學補雲和縣學生數年應貢升國子生天

順壬午舉鄉薦甲申登進士第會修英廟實錄奉詔往

應天太平寧國徽州諸府採錄事蹟還簡試御史事於

南京丙戌拜貴州道御史未上聞按察公喪歸又喪母

高宜人哀毀踰禮庚寅服闋上京師即上疏陳三事皆

人不敢言者復除南京值星變復具疏將上言愈切開

封君作東甌童子篇遺之乃止巡盜上江抵南康諸府

法尚嚴肅沿江諸司各置紙牌籍兵尅期更相考覈俾

往來江上無虛日盜不敢肆監南京內帑諸衛倉及象

馬諸草場吏卒傳相戒曰勿犯金御史攝雲南江西山東三道事劾大臣不任者一人三載考績道得鼻血至南京移疾不視事因圖為去計會臺檄遣巡盜蘇松諸府君辭不往都御史胡公敦勸之乃行人謂君法太重執不變有為君所按者誣君事上奏遂逮捕君君聞命命以妻子屬其友陳御史直夫曰吾不免矣自往就逮入錦衣衛詔獄獄成特命戍遼東三萬衛君談笑就道意慷慨如平時至遼杜門謝客有達官問所欲君謝曰

此正某平生所不敢為者居六年間開封謝事遣襦歸
省病卒時諸子皆不在側家人以冠帶服君君已不能
言但搔首至再易淡衣乃一頷而絕年四十有八君娶
周氏生祺及祐卒贈孺人孺人卒時君葬諸文林公墓
側且自為壙謂開封及弟某曰祖壠不祔懼我兄弟之
後將日疏矣逾孺人既返葬之六年君葬焉卜以某月
某日君性剛斷負才氣見義無所讓同邑進士吳榮卒
貧不能舉君合賻治葬又贈所粥田若干畝遺其家貢

御史壁道死君具棺斂歸其喪南京致賻以行遼有兄

弟相仇者君諭弟辟兄及貧急又賙之所著在官有甕

天稿三卷在遼有東甌童子吟稿三卷廣惠集方一卷

藏於家初祺方娶十日聞父難亟來赴及君被謫兩上

疏乞代父戍不得比歸自遼自為狀述君事甚悉鳴治

嘗謂予曰尚義有子矣銘曰義以為塗帥氣以馳視險

若夷勇不自持謂我好名我職在茲我身弗卹而以名

為人才實難必先大節壯哉金君其死不減

明故正議大夫資治尹工部左侍郎王公墓誌
銘

工部左侍郎王公歸老衡陽至南京病甚泊上新河留
十日卒於舟中其子恩扶襯歸訃聞上遣官諭祭命有
司營葬事進士羅監緝熙實奉部檄入告成事恩寓書
緝熙請銘公墓東陽鄉後進辱公禮遇久矣銘曷敢辭
按恩所述事狀王氏出吉泰和始祖萬莊從父某守邵
陽居衡陽長平鄉遂為衡陽人曾祖某遷鳳山祖某考

諱仕復世有隱德公諱詔字伯宣少警敏讀書目數行

下宣德乙卯領鄉薦正統戊戌舉進士奉使雲南大同

乙丑授禮科給事中丙寅充韓府冊封副使己巳之變

與諸科合章劾將臣失律者及敵薄都城公將官軍民

壯為扞禦計事平上疏請旌死事罰失守及不赴難者

時國家多事章奏繁劇動數千百言大要皆扶忠抑佞

恤民防敵之務天順初轉兵科給事中給勅命進階從

仕郎贈公考妣如其官未幾以內艱去壬午服闋復除

禮科奉勅與兵部及監察御史簡十二營官軍遷右給事中成化乙酉代祀北嶽歸遷都給事於時歲屢水旱陳弭災數十事多見采納天城衛指揮王輔甫弱冠邊將遣備寇西陲坐失律當斬公言輔年少不當遣敗非其罪并其屬皆減死丙戌擢通政使司右叅議丁亥奉勅總易州山廠薪炭事興利去弊具有成績己丑擢工部右侍郎領職如故給誥命進階通議大夫贈祖原簡及考皆如其官甲午遷左侍郎入僉部事修內沼浚運

河修國子監累賜羊酒楮鏹惟運河功最劇特遣近臣

勞於河上者一於張家灣者再異數也戊戌九載秩滿

命仍舊職加正二品祿是歲疾尋愈上疏乞歸不許已

亥城中大水命浚治諸渠道復賜羊酒楮鏹疾再作再

乞歸上若曰卿慎疾自愛勉修乃職其母去公感恩力

疾不敢復言歸庚子春方署事忽中風尋少愈遂力申

前請事下吏部覆實乃許致仕令有司給驛傳陞辭賜

內饌及楮鏹為道里費時公卿而下祖餞都門外侈為

歌詩至溢卷帙觀者皆交相嘆羨稱為盛舉蓋在途閱

一月而卒八月十二日也壽六十有七公溫厚簡重抱

負自許論民情國事疊疊不絕窮居事母必曲致歡適

喜周卹居憂時值歲歉發粟數百石婚葬不舉必為經

畫不俾失所友人王布政汝霖卒於官遣其二子為縣

諸生家教尚肅嘗取祖考所著家訓三十六條篆諸梓

建崇本堂歲時會羣族姓講讀其中尤勤戒飭不使預

州縣事平生所著牋表奏議古文歌詩若干卷藏於家

公居官儉素常俸外不問生業前後四十年田廬服飾
無增拓歸之日第宅荒落恩奉張淑人舟居一周儻館
城南以營葬事予聞之緝熙云張有賢行惟恩一子以
蔭補國子生質美而文銘曰古有嶽降世豈不神彼龐
而竒吾識其人我冠垂紳在帝之側為少司空實惟山
澤才恢器閔公功亦隆公門巍巍與山為崇維山出雲
雨我中士卒歛厥施寂寞可睹六十七年公歸於山有
神不忘公在世間

明故奉政大夫兵部郎中喬君墓誌銘

成化辛丑七月十二日兵部郎中喬君卒於京師吾友
中書舍人楊君應寧實君子傳著君狀君子宗字特詣
予請銘辭復請繼以泣竟不得辭按狀君喬姓諱鳳字
廷儀太原樂平人也曾祖諱彬曾祖諱鑑歷湯陰平谷
二縣簿有惠政俱贈工部右侍郎曾祖妣李祖妣李俱
贈淑人考諱毅累官工部右侍郎妣王贈淑人君少穎
敏五六歲時侍郎公口授尚書輒成誦終卷稍長落拓

有大志從侍郎公使晉藩藩王愛君秀偉欲留為儀賓
君白侍郎公曰丈夫當自樹圖遠大安用此富貴為公
笑曰吾意也事遂止景泰丙子君舉山西鄉薦天順丁
丑登進士第時年十九觀政兵部庚辰選武選主事勤
慎舉職成化丙戌遷員外郎未幾丁王淑人憂己丑服
闋還官壬辰進郎中癸巳丁侍郎公憂丙申服闋改職
方職方事加劇凡兵利害邊務當可否將材諍任弗任
朝省諮議時有裨益庚子奉使廣西時邊報頗數君重

違曹署馳傳冒暑雨晨夕倍道不三月而還居一年卒
卒之年纔四十有三而登科第者二十有四年為郎中
者十年官三命不越省吏部嘗擬陟尚寶卿不果欲議
為藩貳久不決年資寔淡諸曹正郎無歷君右者竟不
及再命以卒君素孝養親疾視湯藥夜不解帶喪居
哀慟前後扶櫬還樂平樂平山谷險隘或躬負輻紉塚
雖官治親率傭隸至相為力庶母高死侍郎公之喪君
慟視生母既喪守節白郡縣上狀詔旌為貞烈之門伯

父老事之如父兄鸞早世撫其孤憲宣俾齒宦籍善交際動無物迂徑直自信不甚為形迹尤篤故舊款洽傾倒至忘官勢故人無小大賤貴皆樂君為人卒之日皆悼有泣下者予及識侍郎公豐厚和易信為貴人見君翹竦繼出知公福澤攸在比於應寧數見宗字皆謙謹篤問學字尤穎異年十七舉順天鄉薦視君加少又以歎君之澤未艾也君配路氏封宜人子五宗縣學生宜以侍郎公恩為國子生宸寀皆幼女一聘金吾右衛指

揮使曹璽卜用是年某月某日葬君長壽山侍郎公兆
銘曰貳卿之子為命大夫豈不能治弓而裘箕是圖天
肖厥才壽則弗如將取之廉而委其有餘已焉哉喬君
其澤弗渝

明故封承德郎工部主事徐公墓誌銘

兵部主事徐君源得承德公訃既為位哭服服如禮將
奔喪襄事自著狀序世系行實請予銘按狀公諱某字
公信姓徐氏蘇之長洲人也居縣東南之瓜涇有田甚

良曾祖華二祖貴三考文質世以農隱故人稱瓜涇徐氏公生十有五而喪父父喪之四月弟瑄始生公籍有世業奉母陳氏及育幼弟雖弱冠彊力如老成人父嘗教以六書九數之學久益精數法能目數行下宣德間詔中使通西洋諸域下州郡簡藝能士以從公用數為郡守所薦會英廟即阼不果行周文襄公巡撫南畿諏訪者俊至無遺策得公喜甚凡財賦計出納籌畫皆見咨問公感文襄知己亦竭智力為之一時政事陰惠及

民者為多文襄欲薦用公不果後繼文襄者數公以文襄故不替禮接然竟無薦者公恒教諸子曰吾雖不仕頗自試然用吾粗耳必欲亢宗濟時非仕不可乃留宗子淵幹家蠱遣源及澄業舉子為郡諸生誨迪嚴甚每庭訓知源志嚮喜曰吾子孫當有為清白吏者源舉乙未進士拜工部都水主事分司山東三載考績進階承德郎以其官封公改兵部武庫凡八年於外公前後數十書皆先官誠後家務未卒之一月猶然公平居孝悌

處家室白首無忤言治家勤儉凡田廬婚嫁創制經費
必親籍記名公大夫有嘉政善行亦手錄焉及在官尤
慎密類為郡縣吏楷式者嗚呼公布衣為時用尚有德
惠君子謂一命士可為物濟信夫公生某卒某葬某銘
曰身不祿仕材則政謀老獲其名匪我自求天監寶彰
靡功弗酬矧直德者勤思有秋曷以喻公公農者流公
有賢嗣出贊國猷澤則弗窮公有餘畱公德不刊我名
在丘

樂亭知縣蔣原用墓誌銘

長洲蔣君原用知樂亭縣卒於官其友兵科給事中陳君玉汝為著行狀請予銘曰原用平生欲得先生文今死矣非茲銘無以慰地下且原用配徐涉書史文義惟銘是屬每泣曰妾獨不能如張圓妻子予嘗識原用於玉汝其亡可念念玉汝言辭至再不忍固也按狀原用姓蔣氏諱廷貴原用其字其先宋禮部侍郎堂守蘇因居長洲曾祖叔昂祖宗韶父惟清皆不仕母趙宗宗室

裔也原用七歲失恃繼母鄒鞠育成之原用數歲能屬對為韻語未冠通舉子義學易於進士奚君元啟游縣學有名成化辛卯舉南畿鄉薦為易魁戊戌舉進士觀政吏部授永平樂亭知縣方視事適歲大歉原用亟上疏乞減賦役什六七民恃以不徙王師征建州道樂亭原用承部使檄總山海諸關驛車馬芻食事先令集縣故僻境部使罕至治率用苟簡原用舉廢治闕勸不愛力每貳佐出納必親衡量吏所具案牘必親校勘越一

年凡地里邇遠民貧富強弱法令便不便皆可掌稽故
賦役獄訟動皆曲當歲所得常廩費不足則繼以家索
未嘗苟取人信其廉郡使至縣例有饋贈原用執不與
或憾且謗之不為動縣治後舊有門吏出入無禁至通
饋謝原用塞之會疾作不便者諷以陰陽拘忌不聽則
傳以他說原用曰故令若某某皆死於是以不塞此門
故邪且人孰無疾疾死命也門何預焉卒不聽疾再作
再間治益力最後大作乃卒壬寅三月二日也原用和

厚不忤物外斂圭角理辨內達遇事乃見始為縣或謂其起富室宜不習吏事原用乃奮志倍力欲自觀其能不幸而死其志亦可哀也原用娶武功伯徐公女為配生女四人某某卒之日徐不能歸玉汝以書屬知永平府姜君璉治後事舁喪西上徐館南郭逆旅一月遺腹得男名之曰壽徐頗自慰忽罹火厄僅以子免原用之幼女死焉玉汝慟不置乃館徐於官邸遣其僕拾餘燼治裝買舟然後歸凡玉汝為原用謀甚悉君子謂原用

交得其人原用先世長洲某鄉某原今歸葬以某月某
吉卜也銘曰位不必卿相稱則賢壽不必耄期名則傳
為名進士為賢令尹吁嗟乎蔣君其死不泯

贈翰林院編修文林郎陳公墓誌銘

吾友翰林侍講陳君師召喪其考耕樂公及妣黃孺人
若干年時葬未有銘師召既登第拜官歸省墓亦不果
作蓋慎之也今年秋師召痛先德久弗識乃授狀屬予
銘將寓歸用諸壙前狀故按察僉事楊朝重未第時作

朝重公戚黨其述事行宜詳東陽師召同官厚且久稔
聞厥世銘宜予屬予亦弗敢辭公姓陳氏諱申字崇澄
別號耕樂世居莆田涵江系出宗觀察使淬淬與金師
戰急子仲剛死父難後淬亦死國事時旌其里為忠孝
坊今綽楔翼然存焉曾祖諱仁祖諱德考諱光遠並有
隱行公貌魁碩動履詳雅讀書曉大義喜談史傳少貧
服賈事漁稼為養時曾祖妣及祖考妣久未葬公痛父
志至或忘寢食及父喪益痛自奮積儉為贏畜乃并舉

諸喪皆用禮葬人歎其難奉母林孺人養必備物病左
右侍夜假寐榻側聞謦歔聲輒蹶起父母喪值忌日執
哀如初與弟戊友愛篤至世所遺田宅悉推予之復為
共歲賦俾獲自裕每夢及父母晨興必告弟持抱痛哭
以為常有女兄早寡教其孤二人皆底成立鄉居雍孫
無競聲忤色人以貧告戚有施疏有貸貸亦薄息或竟
以棄責嘗試長里賦賦不給寧為埤納不忍為培克四
方賓客至日勤館穀有遠適貧不能行者必致厚贐值

橋圯塗淖輒率衆力治之皆有成績可指數人德之至
今不衰孺人黃氏世隣也閑禮度習書教孝養舅姑視
外內族黨有恩誼儉不服紈綺見敗縷遺粒必躬拾之
有嘉饌必蓄為客具及公有義舉雖重費不恡助之此
於公德固大類教子尤嚴肅不溺私愛恒舉近世成敗
子迭為勸戒故師召竟以醇學篤行重於時君子謂陳
氏有世德焉銘曰龐積薄發在物為幸彼邇觀者顧為
物病盍觀陳公久乃彌盛時變俗易趨偽如競公有世

守守朴為正內修外順以聽定命天道弗僭自貽伊慶
我銘匪誣已俟其定

明故封承德郎戶部主事許公墓誌銘

公姓許氏諱廉字清夫四川眉州人家本鉅族元季兵
亂譜逸莫可考公考諱容號松屋母韓氏夢五色大鳥
集於庭生公安表特異兩目炯然松屋曰果英物也三
歲時松屋抱過州治憇城下公仰見城扁眉州二字因
以手畫地宛然成畫自是資性朗悟日誦數百言屬對

響答人摘其竒者以傳舅氏韓叔珪嘗携入成都遠近
聚覩試以詩皆立就稍長通詩書春秋旁涉百氏尤工
書法屢試鄉選不利有司舉賢良辭不就遂棄舉子業
徜徉山水間著筆山樵隱及渠瀾集若干卷蜀人購詞
翰者越郡歷邑至屢接戶外然公恒自歆視未嘗恃以
驕人人益多之公少喪母事繼母若所自出惠撫弟妹
與人交重意氣不為崖岸益非獨葩藻士也正統某年
以疾卒某月葬州西南飛鳳山之原後若干年以子楫

貴封承德郎戶部主事公配周氏撫寧知縣鑑之女少
閒雅喜讀書撰孝經小學列女傳皆成誦孝事舅姑公
疾時嘗割股和藥以進及公疾革欲以死白志公覺之
執其手曰若俱死奈子女何周泣曰惟命時四子相林
梅楫皆幼有諷令業賈為養者周艷然曰非吾夫意也
並遣就學後相為崇王府教授林為國子生梅為固始
訓導楫舉進士拜戶部主事周亦以楫貴封太安人太
安人就養京師復歸省楫奉使便歸省適太安人病卒

丁酉五月八日也年七十有六某月某日合葬葬去京
師遠前後皆未有銘戶部君既復官乃持狀徵予銘狀
稱公負材不試又蚤世卒時無邇遠戚疏皆痛惜不置
諸子皆以儒學取官秩戶部尤顯古稱位不稱德有後
况無位者宜於此取焉是固然哉公生幾女一適指揮
萬壘今閣老公從子也銘曰唐有元賓宗惇夫才而弗
壽中道殂韓銘黃詩哀以吁生也無官歿有譽眉山許
公華且腴五色雜組雙璫琚三十七載如朝晡彼造物

者榮而枯安用有才如此乎公有四子皆文儒前雖不足後有餘公有遺教非庭趨有賢而慈嚴父如龍螭鳳山氣盤紆鍾竒閎秀於此俱我銘茲丘世不渝

明故刑部郎中奚君墓誌銘

刑部郎中奚君時亨勩獄瑞州遠至杭州得疾卒按察副使李君若虛方提學浙江日視疾具湯藥比卒治含歛衾槨甚備航君喪歸華亭時君母太安人及妻若子女皆寓京師聞訃慟絕諸寮友皆驚悼相吊尋得若虛

書稍相慰曰李君不負時亨吾徒可獨負哉於是屠郎

中元勳為狀周郎中良璧過郎中大濮柳員外拱之諸

君屬予銘適君女兄之夫孫鏞者來奉太安人歸自京

因寓銘俾刻石內君墓壙予辱君還往且聞諸元勳及

馮郎中佩之知君賢為詳乃序而銘之君諱昊字時亨

姓奚氏世為松江華亭人質貌穎異九歲就外傳囊白

金為學資有婦人道哭問之曰家貧鬻絲得百錢而遺

之舅姑老無用為饘粥具君即以所持金子之歸白承

德公公曰兒能如是吾無憂矣君弱冠從承德公於合
公疾君刺血醵天求以身代又重傷太安人心匿不使
聞公卒君奉母扶襯歸廬墓終喪籍府學為弟子員舉
成化戊子鄉薦連擢己丑進士第循例歸省壬辰拜刑
部主事明敏精吏法片言擿伏人服其能遷員外郎勘
貴州獄歸奏稱旨進郎中庚子伏乞歸省太安人遂就
養焉居數月會瑞獄作事尤劇君受命往日奔走勞瘁
成疾以卒壬寅三月望日也年三十六娶潘氏封安人

子一日伸女四皆在室君和厚易直重恩義幼學時母
析貲予之君悉讓兄冕俸所得金帛必分族屬為員外
時同年董知縣失官道遇寇貧甚君為館穀給緜纊厚
贖之還使經景州有故寮劉判官死五年不舉君葬之
且卹其家平居恭孫見鄉先輩無窮達皆不敢慢處寮
寀終日不色忤故人多愛樂之尤嗜問學寒暑不時輟
喜臨晉唐書為詩文往往有奇思與客賦詠值意得恒
夜分不寢有干東稿若干卷藏於家君墓在某山葬用

是歲某月某日從吉卜也銘曰利劍研發其聲有劃儵
歸大津光彩滅沒孰爾淬之復爾悶之鬼神有靈百世
其衛之

一朴居士蔡公墓誌銘

進士蔡君清得告歸晉江念其大父居士公未葬葬且
迫介喬進士字請予銘自述祖業甚悉曰清不敢誣吾
祖也清有文學名觀其辭核而理乃據以銘公姓蔡氏
諱潤字懋德以字行號一朴居士先世譜逸不可考元

有諱謙者於公為高祖居泉之惠安祖諱惠至正間避亂泉城婿於晉江朱氏始為晉江人考諱輝國朝永樂間舉貢士母林氏公少失怙家貧甚門戶幾落公奮自樹拔與其配林氏備嘗艱苦銖累寸積積稍裕及母棄養諸弟妹皆壯長力為婚嫁弟懋敬病且死舉財物契券及其遺孤屬公公治後事撫其孤長則悉舉故所屬者歸之嘗曰吾不能顯吾親期不辱吾不能庇覆吾兄弟亦盡吾力而已矣年五十外內事悉付二子惟課孫

讀書督僮僕治樹執暇則匡坐一室非大賓客及鄉飲
禮請未嘗出戶闔雖居闌閭間有不知其公者公重先
祀昧爽謁祠堂已乃出治事夕復謁始就寢祭必備物
或病弗克與則飭子弟惟謹身以勤教孫清出就傅且
必問曰清入塾未未則戒之曰汝貧家子不可作富貴
相見其字畫不楷則曰是亦學也奈何不敬凡器物或
損壞未嘗介意獨於書甚愛護每戒子孫曰吾於此雖
不甚解然聖賢所著要不可蔑視且吾先世遺物惟此


耳汝輩慎守之見子孫為服為新製輒感然曰何得效俗兒女子態也公性謹飭不喜博奕戲劇事質不外飭嘗曰吾無他技能惟一朴耳其所自號以此公既不試志業無所見故其言傳為多郡縣吏雖不時見然知公賢恒曰使吾民皆蔡某官府無事矣按察僉事林君克賢恒下郡縣詢行義命泉州知府沈海書公名榜於旌善亭云公卒於成化某年某歲葬潯美山壽七十六配林為山陽教諭廣之女子三長觀慧清父也次某某孫

四曾孫一存畏銘曰善下必大惟實則有節不必竒庸
乃可久曲士詭行嗇夫利口勞身狗名為祿之誘若直
斯獵若戈斯取旋棄所執若視芻狗嗟今之人固也誰
咎朴哉蔡公有順無操外無顯名內省奚疚公心則寧
公死不朽

懷麓堂集卷四十七

謹案卷四十六第一頁前八行台哈布哈舊作譚
不花今改 後一行博囉舊作孛羅今改 後
五行哈喇岱舊作哈闌歹衛拉特舊作瓦刺今
並改後倣此





總校官庶吉士 臣 張能照

校對官庶吉士 臣 徐如澍

騰錄監生 臣 張虎文

騰錄監生 臣 魏 鎔

欽定四庫全書薈要

集部

懷麓堂集卷四十八

九

評校官候補通政司經歷臣郭祚熾



欽定四庫全書薈要卷一萬六千六百七十七

集部

懷麓堂集卷四十八

明 李東陽 撰

稿二十八

誌銘

明故征西將軍鎮守寧夏後軍都督僉事周公
墓誌銘

公諱璽字廷玉姓周氏其先本永平遷安人伯祖亨洪

武初內附授燕山護衛指揮使賜田宅因家東安祖斌
永樂間以靖難功當擢都督讓於兄或考諱英宣德間
坐累謫戍開平衛累功擢都指揮同知寄祿府軍前衛
成化丙戌以老謝事公代為指揮使辛卯征北邊以功
擢署都指揮僉事用薦領十二營號令尋統五軍右掖
戌戌勅充右叅將分守陽和庚子與威寧海功進都指
揮同知調大同副總兵辛丑以黑山墩功進都指揮使
壬寅以黑石崖功署都督僉事癸卯北邊亦思馬因大

舉入寇分兵三千守懷仁賊逼夏米莊中軍失利公還
兵內援夜忽值賊營時賊乘勝勢甚銳公大呼屬將士
曰今日之事有進無退退則無遺類矣衆爭奮無不一
當百銳弩齊發呼聲震天地賊少却良久復突入短兵
接公臂中流矢令左右拔其簇督戰益急與其子鵬及
死士數輩斬獲十餘級會遊擊將軍劉寧兵至合為一
營中軍潰卒多來歸兵勢乃振賊既退失律者皆得罪
錄公功進都督僉事甲辰改充總兵官鎮代州兼督鴈

門三關弘治戊申移鎮陝西庚戌命充總兵官佩征西

將軍印鎮寧夏甫一歲議修邊備為遠久計偶得疾召

諸子曰吾生獲佩印分閫分已足無所復望獨未嘗大

破北邊為朝廷報抱恨死矣氣就絕忽大呼曰好殺好

殺遂瞑是為辛亥七月十五日年止四十有二生子四

長鳳蚤卒次鵬以從征功累官錦衣衛指揮僉事次鴻

次鵠公醇雅有禮度中亦負氣蒞事斬斬尤精騎射知

兵習戰近時論邊將者必指屈馬奉二親謹甚迎養大

同比喪遣諸子還葬都城東今所祔墓是也其名曰魏
村社之原予雅聞公賢公之卒錦衣衛指揮同知劉公
彥芳持狀為徵銘予又聞鳳卒時其妻都督王君賓之
女號泣不食死詔旌所居曰貞烈之門公之風又於是
乎在銘曰漢出雲中動以萬騎公兵三千力折寇勢宗
睨西夏凜為外虞公提全軍坐鎮屹如惟公才賢適際
斯盛以守則固以戰則勝惟天子聖俾我兵是競惟古
將才必鍊乃成公在三陟久益有聲天弗假年疇不興

戚曰此豈易得而奪之亟有歸東原公歸其間公靈在邊為河為山偉哉公名雖死其勿諼

朝邑縣學訓導致仕張公墓誌銘

成化乙巳夏六月二十二日朝邑縣學訓導致仕張公卒於澤州自甲辰之秋山西大饑人相食餓莩蔽野歷冬及春厲氣交作死者復相繼時公年已七十有二其卒也亦以厲云嗚呼傷哉公諱翔字騰遠世為澤人考諱某母宋氏公生而聰慧果毅工書善記誦入州學為弟

子員問學勤厲雖大寒暑必正衿披誦未嘗色情事親
志養產不踰中人而奉養必備親疾必憂形於色奉三
兄謹甚不命之坐則侍立終日家中析公所取田廬未
嘗有所擇兄泰夫婦繼卒以遺孤屬公公撫若己出為
娶婦至長子孫不使異產父喪嘗市木為棺而逋其直
偶行雪中躡得一物視之乃白金一錠求其主不得遂
酬木直鄉人異之曰此孝徵也凡喪具服制皆用考亭
禮以至於冠昏交際皆然公以詩舉於鄉屢不利以例

貢禮部始授學職至朝邑歎其學政久弛身先訓率必敦本實次及文藝亦嚴立程格終始不變於是科第踵接九載有成績當陟以老乞歸家居惟課子孫讀書史申明孝悌間以訓鄉後進勸善戒惡其言悃悃懇到聞者悅服皆稱為鄉先生焉公嘗慕薛文清公之學遣子澤就學河津舉進士知武安縣實就養教以官事澤以廉能著政譽徵入為河南道監察御史蓋父師之教為多公子三長澤次漢次某初張氏墓在河西金剛嶺今卜

遷於州城郝家莊之原以是年某月某日葬御史君奔
喪將歸介其鄰武學生徐君鏞來購銘予聞御史賢按
所自著狀得公行且悼其值時厲以死雖壽宜傷也蓋
於是深有感焉乃作公銘銘曰生也逢時壽考且康老
不逢年卒以疾終古有養老於鄉於庠國典具存而公
則亡吁嗟乎張公

焦生邦重墓誌銘

焦生瑾字邦重侍講學士守靜先生孟陽子也卒於京

師先生哭之慟至忘食寢予先生同年友義均兄弟聞
生死悼歎不能置與諸同年為文弔之及歸葬泌陽先
生自書其性行歲月授予屬銘予尚忍辭哉生始名思
榮蓋先生舉進士為翰林庶吉士生京師報至家時
有司方建綽楔榜曰恩榮先生之父封編修公遂以名
既長乃更今名生四歲喪其母呂孺人先生以編修歸
省實攜生以從既還朝公及祖母某孺人留不遣七歲
病癖藥之愈公令羣兒戲聚以悅生生每凝坐不一視

公異之稍長授以詩書不數過輒成誦公曰此可教也
遣其兄琦携致京師就外傳沉默自持雖師友問答不
過數語先生疑以為鈍及考所業則未嘗不通平居言
若不能出口及誦書史見古人事行試令辨曲直賢不
肖時當人意為舉子義輒合榘度書字亦清勁同學者
皆自謂不及不妄取予不濫與人接嘗謂其弟黃中曰
吾見同游有狡詐者彼自謂得計詐豈能欺人徒召憎
耳汝資性過我但恐為此輩所移易汝其戒之嘗侍先

生獲觀程明道秋日詩邵康節大易吟退書之几格反覆諷誦若有所得也生嗜學欲速就積勞成疾見其父憂形於色輒強顏慰之曰兒病行愈大人幸盡心職務勿以兒為念踰年益憊先生謂曰兒脫不諱俟汝兄兄有二子者為汝繼不殄汝後生但飲泣其繼母郭及兄瑞問之皆不答私謂其姑曰我無他屬但勸我父勿哭我也成化乙巳六月二日卒年二十有一聘胡氏縣學生繼之女待年久之竟未及娶以死予同年家子弟若

侍講東瀧彭先生子彬方石謝先生子興仁今南京太
常少卿愧齋先生子罕皆敏而早卒予連喪二弟山川
慟而成疚故於生感之尤深嗚呼吾又忍銘哉銘曰嗚
呼焦生胡質斯弱而志斯強踴躍振迅倔起而莫之撓
也稼未穫而稿樹未實而傾天寶摧之豈人弗能吾為
汝銘以釋汝靈以慰汝父兄嗚呼焦生

明故文林郎河南道監察御史李君士常墓誌

銘

成化乙巳春三月士常以御史巡河南東陽與倪學士
舜咨諸公出餞城西僧舍士常意眷眷不忍別冬十月
聞巡撫都御史報則士常已不起矣東陽與舜咨驚愕
相吊既又與姍友潘時周會哭以書訃其兄士儀士儀
悲慟欲絕遣弟繕及從子穆迎喪遣子稷來告哀徵銘
東陽得書哭失聲及喪歸道京師寓諸郊數日東陽與
諸友往哭奠之乃為銘畀穆歸俾葬焉嗚呼吾忍銘士
常哉士常姓李氏諱經別號力齋其先鳳陽臨淮人也

曾祖諱濟元季以鄉兵歸國累功授廣信衛正千戶祖
諱庸陝西都指揮僉事考諱徵萬全都指揮僉事始居
萬全兄士章署都指揮僉事世有勲望士常幼端重如
老成人為都司學生刻志問學夜或睡輒以手自批其
額頰舜咨父尚書公謫戍萬全士常實受學有名諸生
間葉文莊公為巡撫賞愛特厚薦於我外舅蒙泉岳公
為婿公時知興化府得葉書曰與中不吾負亟報許之
士常游蒙泉門久學益進御史林貴實閩子與督學政

咸見器許甲午舉鄉貢戊戌登進士第奉詔入翰林為庶吉士辛丑拜河南道御史奉勅巡山海諸關二年政令明肅歸掌道事覈京官稱負尤嚴慎不苟及巡河南令有司毋貸市物而稽其直聞者皆相戒莫敢肆時歲大凶上疏言懷慶諸府民父食子兄食弟骨肉親黨相噬死徙十六七雖蒙赦宥宜大肆蠲卹庶他變可彌又與巡撫會議諸賑卹事未及報益憂懣簿訟填委弗遑寢食冒暑至洛陽疾作復有公事當詣汴猶閱案過夜

分乃行至則益甚語已不可辨猶隱隱言抹荒事九月
二十一日卒屬纊時巡撫及布政按察諸公皆臨視知
開封府張九雲治舍斂棺擲官給驛傳復遣使護送以
歸十二月二十九日葬泡沙原祖塋之右士常天性孝
友又習世訓居喪蔬食三年兄弟雍睦晝聚處堂上暮
乃歸寢兄出未返過期不敢飯閨壺和敬迭為賓禮叔
母寡而守節終身母事兄士章子指揮同知稽及穆
及兄純子程秀皆早孤視若己出或親為講授繕庶弟

也遺腹於外及長謀歸之為娶婦焉士常赴義如渴勇
不計力人有善推誠嚮慕意氣所屬歷歷出肝肺守官
清儉家指既衆俸不給或稱貸為日夕計及遇文人墨
客竟日延欸與相倡和所得詩賦至累篋笥猶酷好不
厭自出翰林為御史雖極通要而非其好竟憂勞以死
嗚呼悲哉士常娶於岳賢而早卒封孺人繼娶王為即
墨知縣時佐之從女封孺人生三子秩和穉皆幼士常
善楷書恒曰吾兄書法過我謂士儀士儀乃自書此銘

曰以慰吾弟東陽為篆蓋亦士常意云銘曰官高任艱
君子之憂曰貴曰富匪我攸謀彼籍勢者為身為家官
而已矣遑卹其他君居御史不樂其華我職弗遑而暇
為夸孝廉儉勤君行則有歛焉弗張君子之守迪而獲
咎豈理之常人則何尤悠悠彼蒼我銘士常百世不忘
封宜人喬母路氏墓誌銘

兵部郎中喬君廷儀既葬樂平長壽山越七年成化丁
未七月六日君配宜人路氏卒於京師故弟子宗宇輩

扶柩歸卜明年正月某日啟窆而祔以予嘗著君銘知
族系家範頗悉請誌祔事及宜人懿行庶有所互見者
嗚呼先君之殯也宗昆弟慰我相我意勤甚今日之事
予惡得無情哉乃強援筆為誌及銘路與喬同出樂平
族故望宜人營繕所丞仲室女在襁褓間為怨家所毒
幾死母孫禱於神而甦因異之少精女事通孝經列女
傳諸大義未筭有縣令主其家從者亡金五十兩懼欲
自引決宜人偶得諸後圃白其母還之郎中君從厥考

工部侍郎公試京師營繕重其秀且文遂受聘焉既歸
晨夕饋食湯藥暨諸時祭皆精洗有度事姑王淑人及
庶姑高烈婦懽曲承順善成其懽郎中君肆舉子身以
勤相夜夜鼓始休漏未盡必夙興以待比舉進士官兵
部封安人又進封宜人雖寢貴服用皆故物從子憲宣
失怙恃撫之有恩宗宇幼手教字畫稍長遣就業每嚴
誨戒及宇舉進士授禮部主事戒加切每朝有吉禮宇
典儀制例得賜幣宜人必斂容曰此君賜也宜人何修

以報宇將造朝必起坐詢早莫出乃就寢故宗宇皆有
名士大夫間自侍郎公以下三喪宜人皆歸治葬已復
就養益綜家務雖無羸貲食指數百皆受給處側室陳
寗三十年畧不為形跡至同食飲視庶子宜宸容未始
有異侍郎公當廕國子生宗以長以讓宜宜人喜曰兒
能爾固善尤樂施予族姑子張戎貧不能娶給以金帛
永清馮德成者有急質女求貸貸之金并其女歸之從
子僕劉溫廢疾被出宜人憫其窮為之娶而遣之聞其

籠鳥於市者粥而縱之以為常其多至數千焉平居溫厚容忍簡言咲婢僕輩未嘗見喜愠色戚黨女婦凡一接無不意滿卒之日多感慕泣下曰今安復有如喬宜人者邪銘曰有夫克肖婦佐之孝有子如夫維母之撫從人者艱實恃以久為所從助乃謂能婦亦謂能母生從厥居死從厥封我銘郎中繼銘宜人以備始終

封宜人朱母黃氏墓誌銘

予少與崑山朱儀中交甚厚獲拜其父奉直公及母黃

宜人宜人之喪儀中將覲自太原未行得訃至京師乃

自述事狀請予銘曰以此累吾友也是宜銘宜人之先

蘇之長洲人處士仲光之女朱在隣邑族相望又俱籍

京衛故宜人歸於公宜人事舅姑甚謹凡侍疾居喪如

居官省時家寢饒食指益衆相公蠶幹雖澣衣敝物不

忍棄睦處姊姒均視羣從翁無間言下逮臧獲小有過

務掩覆之皆飲德焉儀中始自黌塾歸宜人必詰所業

視勤惰為憂喜比舉進士官兵部教使清白奉職以承

父訓日勤勤不置以主事貴封安人以員外郎進封宜人儀中為郎中坐累謫常德同知改知德慶又內徙同知太原道京師乃請就養宜人不肯行又閱歲而卒距儀中至僅兩月耳儀中痛身在遠貽其母之思以沒且弗及含歛曰吾乃以此累吾父也復念其兄縉在蘇尚未歸又數月乃葬蓋宜人卒以某年葬以某日其地在城南十里河之原舊以族葬地且陘乃闢其旁遷壙其中而右虛焉禮也銘曰有子翹矣愛亦勞矣養弗酬矣

嗟無繇矣訓則勿違行則勿隳維子斯才以成母儀維
宜人之宜兮

華編修伯瞻墓誌銘

嗚呼伯瞻乃止是耶伯瞻質偉氣充才勃勃不可遏其
志所期甚遠且大舉進士財三年官一命年二十有四
而止悲夫初伯瞻從其父廷佐君居京師時未冠學於
楊邃菴應寧與太原喬宇希大並價予見伯瞻書勢已
逼人私喜吾湖南後來之傑蓋其在此及伯瞻舉鄉試

第一連得進士入翰林為庶吉士汪寅軒傳體齋二公
奉詔授業大見甄賞每閣試與稿城石珪邦彥相甲乙
授官為編修予又喜曰此天所以玉其成也予與廷佐
君同鄉又邃菴知己友故伯瞻視我厚至是又同署日
益密每有作未始不出見見輒加進一二載間遂脫舉
子習得古人蹊徑詞簡意達粲然成章予嘗以聞諸劉
文安公者告之謂為文必先博而後約收斂太早則其
地無所容伯瞻以為然然執不變意者天將速其成故

使至是哉使天果有意焉則斯人者胡不姑涵育長養俾大有所就之為愈也予益以慨人之才不易得且不易成也悲夫今年春廷佐君以常州知府入覲歸伯瞻已病秋益劇卧不見客予數往乃彊見之恠其神蕭然比得告猶函一卷具書致予曰巒且別願得手書數通以歸書未成而訃報予既往哭之念無以慰其志者乃據邦彥所著狀為銘屬希大書而刻之又自書於卷中以畀其家歲焉償舊諾也伯瞻姓華氏巒其名世居蘄

州以州學生舉生成化某年卒弘治某年葬於州之某
原娶王氏子女各一人皆幼銘曰吾黨得之吾曹得之
而遽失之吁天誰詰之

奉議大夫刑部郎中何君墓誌銘

君姓何氏諱說字商臣世為郴州人祖諱義堅合州同
知贈戶部主事父廷彥雲貴提學按察司僉事君少從
按察公遊學京師赴湖廣試御史樊君英奇之比卷拆
且盡得其名謂衆曰此不可使小就寧勿取後數年成

化庚子果得解元連擢辛丑進士第久之授刑部主事

侍郎建昌何公嘗監試湖廣雅器君見所屬獄案曰吾

謂子文士耳乃能是也嘗勘獄順義有兩豪爭地事涉

中貴人剖析無所避遷員外郎時何公為尚書令總諸

司奏牘校閱精敏山西有亂民御史以謀反奏獄且具

君閱卷曰反罪當孥此不過假佛惑衆雖潛表通賊不

果至乃謀叛叛止死耳竟用其議活數十百人及遷郎

中階奉議大夫嘗奉勅錄囚南畿凡錄六千人上讞三

千餘疏多所平反揚州有毒藥殺人獄君析其疑數端
果邏人有隙者所構奏釋之廣德有饑民貸穀不得而
羣奪之者連四百餘人皆坐死君矜其情許自首使償
穀且杖遣之皆泣拜而去歡動州境還朝名愈彰莆田
彭公為尚書益重之旁攝他司事鉅細無弗集者弘治
癸丑刑部災君坐本司下都察院獄詔降一等補外君
在獄已沾疾得命出一日未調而卒惟其子進士孟春
在側大夫士聞者皆悼君賢弗克壽且竒孟春才哀其

摧毀骨立又貧甚貸而將事右諭德劉君道亨為著君
狀孟春予禮部主舉以君治命且受學焉哭告予曰微
先生孰可屬吾父者嗚呼予安用為君慰哉君父按察
公舉己丑進士累階奉政大夫致仕以恩加修正庶尹
子二其次孟旦女一君年四十有三卒於某日卜用是
年某月日葬某山之原君清謹重厚不許人過遇事有
力母喪廬墓有芝生於旁人以為孝感云銘曰惟湖南
地三世進士自何氏始亦云竒事家用易學受父授子

科必丑歲歲必周紀君舉在辛先已後癸君獨中阨如
澤斯沛孰停其原孰導其委天實為之請究終始

明故兩淮都轉運鹽使司知事周君墓誌銘

君姓周氏諱澄字原潔其先自道州徙巴陵塘源居數
世曾祖諱國才祖諱桂芳考諱思恭妣傅氏生四子君
其長生有奇質受書鄉塾兼通法律有用世志未遂也
湖廣布政使司嘗缺知印知印者主印記出入役雖勤
不與諸從事伍君以名為府縣所薦黽勉就役而非其

好有為布政者雅器許之或諏以政務亦稍稍自見授

廣州府倉大使當藩臬交會出納繁夥勤會計慎勾稽

宿姦歛手不得肆則相扇為浮詞構以罪按察分司不

能直君具疏懇諸朝下御史按察姦狀事乃白秩滿丁

內艱服闋遷浙江上虞縣主簿地衝要多賦訟君以習

律故皆剖析得理部使有大獄久不決則以委之嘗攝

餘姚縣事餘姚故接境民間君至輒相率共賦役不督

而辦叅政何宜檄領京儲兌運事舊時悍卒多怙力侮

民代補耗虧為所困君悉意規畫益嚴為約軍民皆稱便何嘗與論水利至夜分不寐歎曰能官也浙東海溢上虞尤甚工部侍郎李公顥築堤海上君承檄受任與有勞効九載將去父老合詞請留於御史及布政按察例以未報政不許比上吏部考入優格復丁外艱服闋擢兩淮都轉運鹽使司知事署泰州及淮安二府分司兼掣淮安鹽貨嘗攝篆事事皆集諸場戶白於都御史張公瓚再被獎諭聲益振然亦坐劾瘁得疾成化癸

邠八月朔卒於官年五十有九有司用例具舟歸其喪

乙巳某月某日葬珠冠山先塋之次娶某氏子四長質
次貴次賢次賓君葬未有銘貴在京師聞母喪將歸地
狹不合葬畱別為銘內君墓乃奉柳貢士大綸所著狀
介李貢士永敷以請於予嗚呼今之人或負才挾智位
小不稱志己不屑致力或躡重泥遠名浮而實喪雖貴
且顯亦奚以為哉君歷三職二十年官不過八品矻矻
窮日夜竟以勤死計其所克濟亦已多矣是可錄為有

職者勸銘曰匪甲科是塗而辟於藩弗正寢是終而死
於官然則生詎非榮而死寧弗安後五年而得吾銘庶
以為永觀乎

懷麓堂集卷四十八

欽定四庫全書薈要卷一萬六千六百七十八

集部

懷麓堂集卷四十九

明 李東陽 撰

文稿二十九

誌銘

退菴處士趙公墓誌銘

予舊居西涯與退菴趙翁同里開先公年與相若時歲
相還往既遷城西時時念之翁以其子永學於予先公

實見命焉先公之喪翁每為助夫經理諸葬事不厭纖
悉且為相吉壤適厥先墓曰庶幾他日相從於地下也
予用是念之不忘嗚呼孰謂翁亦棄我去耶翁本臨淮
武家祖仲良以伯父勝貴贈明威將軍長陵衛指揮同
知考諱雲從兄於官遂為京師人翁失怙與兄某承奉
母賀氏以居甫弱冠輒共任家政遠涉湖海為陶倚術
既負藝識儕類歸服家日裕視兄為多兄卒禮事寡嫂
婚從子三人一人為僧別構菴居之獨念得嗣晚義給

貧困折券棄責將為後地踰年而永生又數年後得子
景翁曰永也敏可使就學俾事舉子業將用儒顯蓋於
此有遺望焉病且革強執予手意有所屬也將屬續其
家問之曰得無念永乎乃泣然隕涕而絕方予之未至
也以所名子通治賈事頤指手授克獲其力人亦以見
公之能云翁初娶吳氏生女四人適某某繼娶胡氏生
永景及二女適某某翁生某卒某壽七十六墓在都城
西北傅家庄之原舊以族葬吳窆其右方至是永景啟

窀穸內公柩祔以吳而半虛焉既得卜於某日永號泣請
曰非先生銘孰以慰吾父者乃為叙及銘銘曰吾父之
葬實鄰翁墟吾神不孤翁與為徒翁生我娛翁死我吁
我情所於銘其舍諸曷其訪翁墓祀之餘

喻孝婦墓誌銘

有服衰杖桐乞為其母氏銘者介指揮張文仲以請予
辭曰女德類弗著勉為之非吾意也張曰茲有孝行其
諸異乎世之為婦者敢因以請問其姓名則吾友司務

喻以正之兄以善之子心固已許之誦其狀為訓導仇
東之所著蓋喻氏一孝婦也因嘆曰嗟乎近乃有斯人
哉世之稱為子者尚不克自致於親況婦姑哉誠有是
雖不吾請吾固將傳之按孝婦姓王氏諱真其先出浙
之仁和永樂間徙實京師為順天大興人考諱貴母陳
氏喻本南昌望族以尺籍隸京以善其少也方擇配孝
婦歸焉事姑韓謹甚韓嘗病亟藥弗效孝婦計無所出
瞿然曰嘗聞老醫言人肉療奇疾非此不可即潛入幃

中剪左股肉為糜以進韓食已爽然而甦曰吾已分死不救何醒之亟也孝婦匿不言韓察其有痛狀詢家人得之泣曰新婦乃至此乎天道亦甚邇願新婦他日得婦如新婦也鄰黨歎息或為泣下以善以內行不自暴有司者莫能旌之然人多稱為喻孝婦云孝婦年六十三卒某日葬大興東郊下馬社先塋之次子一曰春嘗捐貲給邊授階七品孫一初孝婦之嫁也喻業中落以善始起廢成裕孝婦稱內政實與有力及富不妄費一

錢惟享祀必洗腆撫臧獲務俾飽煖無怨言此其餘事
云銘曰昔有崔婦登堂乳姑姑視吾婦汝報不孤喻婦
實難彼崔弗如彼以其力我以吾軀惟天弗誣有子克
家有狀足徵我銘匪誇

明故封大中大夫陝西布政司左叅政梁公墓
誌銘

崞為縣在代州邊地多武尚鮮有以儒顯者自直軒梁
公以子璟貴封徵仕郎兵科給事中再封大中大夫陝

西右叅政其配某累封至淑人及見其子為都御史鄉
有識者皆感奮曰賢哉梁公乃以子致貴如此皆遣子
弟就儒業多至若干人比公卒無大小疏戚皆會弔齋
咨涕淚以為公實啟我今不可作矣時都憲公方承勅
巡撫湖廣歸奏於朝計襄事期迫不克久滯都邑預囑
其甥丁戶部紳請予銘刻石公諱資字叔敬直軒其別
號也曾祖某祖某考某皆寓儒於農公通六藝能為五
七言近體詩每見前賢格言善行必興慨慕恒歎後進

士曰讀書不求實踐猶不讀也性質直無他嗜口不談
勢利尤不信釋老喪家有問禮者輒云佛老法語人過
及改悔則又為獎振之故雖被斥責亦不為憾且賴以
自直達官貴人多折位勢為禮貌若都御史李公祝秦
公絃每詢兵農政務語必移日而一不及私二公退曰
梁先生吾之石洪溫造也璟不能言口授以詩輒成誦
知非凡子俾舉進士竟以是成其在兵科為給事中戒
以清慎始貶錫命為叅政益舉職左都御史余公子俊

而下偕旌之吏部下御史覆實命始再錫副都御史雖
要顯秩不過三品錫不改命然鄉之人皆以都憲禮尊
之無異詞公益遜避若未始有者蓋終其身不變也尤
嗜義媼戚婚葬視力為給旁及鄰里多飲惠沐澤焉壽
八十有三忽疾革召子孫具湯沐澡衣曰吾今日稍倦
殆將歸矣問以後事不答越明日乃逝是為某年月日
配史氏賢而同封累號曰淑人先公卒子二長琮義官
璟其次也孫五枋楫及某某曾孫七淑人葬某原公卒

之年某月某日啟竈而寔以淑人祔嗚呼古者文質並
用乃稱君子世降俗薄識者病之梁公以經學顯實由
父教都憲尹敦雅不浮慎守恒軌不為勢位所移易其
於家訓益有徵焉公其賢哉生有譽望沒有銘誌以貽
後人非侈也銘曰梁望西徼顯於封君維君有封維子
有勤我溯求之由枝逮根越三世以降種德以芸久乃
有獲自貽厥身屹屹西亭位隆望尊彼稗與莠曾何足
與倫我最其德以刻銘之

明故鎮國將軍都指揮同知王公墓誌銘

王氏出鳳陽潁上為世族元山東行省右丞榮入國朝
內附洪武初授神策衛百戶遷密雲中衛副千戶子禮
嗣從太宗靖難遷指揮僉事子宣嗣實生公諱榮字士
華五歲而孤正統改元嗣指揮僉事署衛政分領邊伍
名漸著天順壬午用薦承勅鎮密雲古北口諸路公申
號令利械器閱兵實旅分前後次日嚴備守憲廟即阼
賜白彩幣敵入寇公出龍王谷追三百里俘男婦八人

斬首九級捷聞擢署都指揮僉事所統官軍士賜官賞
有差成化癸巳敵甫入公出大水谷追四百里斬首五
級遂拜受都指揮僉事甲午復追敵古北口三百餘里
斬首十七級歸所掠牛羊以百類遷都指揮同知躬閱
要害置窖窩弓釘盤諸器賊近輒受窘以去其所鎮地
西東五百里長城萬餘丈皆壘石為之水至輒敗修築
無寧歲公煉為石灰填土為甃重治之城因不圯復以
地廣難備請移闕東北姜毛谷諸隘地增城堡遠斥堠

前後至二十五年境內寧謚朝議偉之會有嫉公者媒
孽其短遂謝事居五年卒弘治某年月日也壽六十葬
城東五里原先墓予聞邊將與大將異才而所處亦異
宜公所負抱無愧所謂邊將者用不競施而滿見沮厄
豈不惜哉公娶夫人孟氏繼夫人朱氏子五人某某孫
三人某光祿典簿李君廷器為勲請銘自為著行狀并
道其終始之概如此銘曰闕城翳翳為國東蔽屹屹王
公手扼其隘寇至輒退我擊其背彼既失勢莫我敢肆

孰能挫公敵不在外公不自媿曰我寧退官我自取亦
復我棄孰謂公棄公澤在世

楊君丁宜人合葬墓誌銘

吏部右侍郎楊君文懿之配宜人丁氏扶公喪歸鄞朝
廷方遣官治葬宜人亦卒其子按察副使茂元任湖廣
合葬於堂洞山之原公行既有銘而宜人事未及載茂
元乃具書請於公弟翰林侍講帷立速不置予以公故
不敢辭宜人公同縣人也父諱瑄正統間舉鄉薦未仕

而卒時宜人甫四歲從母棲育於縣南王氏王氏翁諱

宗遂頗讀書尚義氣見宜人夙端慤不苟訾笑口授孝

經小學慎為擇對公以諸生赴試間過翁翁與語驚曰

此名世才也遂以宜人歸之宜人出富家而楊氏世素

儒食指數百藜菽苦弗繼宜人脫簪珥躬織作以佐養

且給公游學費雖涉疲悴了無懟色人以為難景泰庚

午公發解浙江明年舉進士以翰林庶吉士丁父憂連

遭大父母喪宜人承公意治後事甚備事姑張夫人寒

暑不易節見稱孝婦既闋服從公於官天順壬午以編
修貴封孺人迎張張弗至每製新衣及致珍味封襲以
歸成化戊子從公歸覲日具冠帔自堂下上食及治葬
如喪舅時己亥以侍講學士貴拜宜人命及公遷少詹
事始得通籍中禁預兩宮朝賀屢荷錫賚公為吏部二
子及諸弟皆舉進士布列京署家極顯宜人猶勤內政
躬課諸婦習女事每客至庭戶輒聞織紡聲家人勸少
休則曰我固樂此且以為子孫法耳蓋至於老不變云

弘治某年月抵家以積憂成疾某日卒壽六十有四少
公一歲三子茂元其長乙未進士累今官次茂貞早世
次茂仁丁未進士刑部主事皆有文孫七女孫三某月
日合葬焉嗚呼文懿公以家學名天下其子姓羣從蒙
養壯習皆是物也及其漸積涵洽以底於大成豈獨庭
訓固亦有內則哉是宜銘宜人之德以為公祔銘曰
冪深閨左書右詩為女中師嚴嚴廟宇朝劔暮宮為大
夫宗婦少而劬劬老而於於我儉我勤孰我或渝以迪

以遺皆夫君之餘其餘伊何台爾鼎爾我力弗既庶其
在此雖復有此惟夫君是似夫君是似我死其無媿

封孺人張母姚氏墓誌銘

都察院右副都御史張公敷華以湖廣布政使拜巡撫
山西之命歸安福省母姚孺人至黃州得訃亟奔治葬
事事且集以例告守制於朝會廣東叅政伍公孟賢在
京師因請著事以屬東陽為銘以掩諸幽時其先御史
公諱洪死國難以遺衣冠葬於官山原已四十有三年

至是合葬禮也初張氏世居安福之梅溪為著姓而姚氏亦望於杉溪兩溪同里二氏之為姍姍不絕孺人父諱某母某氏生而敏慎禮辨內外雖屬姻戚罕有一見其面者涉書史能解列女傳恪奉婦職姑疾踰年躬進湯藥葬祭無違度御史公既取進士有官守劾姦糾慝不復顧家孺人獨任內政不貽外慮公按蜀有患其摧剝者挾賄入京師為中傷計而官邸清肅無所投隙竟厄不行正統己巳公扈從至土木不克歸孺人日夜號

慟聲徹衢巷後朝廷進錄死事賜恩封孺人左右進命服服以拜賜已而泣曰未亡人以遺孫故不能死誠不忍服是遂終身不復服携孤南歸日勤苦為業遣就外傳嘗指公所誦書諭之曰此汝家世業汝父以汝輩遺我汝弗子我即弗能母他日何用見汝父於地下後敷華以公廕為國子生繼舉進士累官布政使歷浙江湖廣孺人皆就養於官意甚樂然雖貴壽時親女事婢僕效職僚屬家亦有化者焉居湖三年忽思歸歸數月病

革前數日謂諸孫曰汝父已得都御史行省我矣蓋其
神爽不亂如此嗚呼古恒以忠臣烈女相配謂委質與
致命之義同也御史公不辱於國而孺人不玷其身以
成其家亦庶幾此婦不愧此臣也其固有所視傲然哉
孺人壽八十生某卒某葬某子三某某女二適某某孫
四某某因為銘曰夫死國難婦死夫婦雖後死死不孤
孤者既壯榮弗枯先咷後笑非我圖圖用不辱為道餘
報歸地下同歡娛夫乎不愧汝與吾朔魂楚地歸來乎

彼嫖弗終隳厥初朝擁荆鬢墓羅襦生如繁葩死泥塗
誰復此景收桑榆我徽懿行厥子於銘哉銘哉卒不誣

外姑宋夫人墓誌銘

嗚呼悲夫我外姑宋夫人之喪外舅蒙翁岳翁無一息
之瘠其伯氏處士公亦已壽終從子許又客於外病且
革家具蕭然無以供後事者自脫簪制棺為月制制甫
畢而續屬決於是伯母陸氏為治喪從子均垣墉從孫子
杞林及標格楫梁桂集相與奔走扶柩歸溇縣相於公

墓東陽謹著銘刻石以內諸幽嗚呼我蒙翁之盛德大節所以遺其家者乃至此哉夫人陝之咸寧人世有顯者夫人生而莊肅通書能琴精女事厥考前知州翁擇壻得翁曰此天下士也遂歸之舅氏府君指揮公家甚盛姑劉夫人性嚴奉養惟謹正統末翁進士及第歷翰林編修修撰受知英宗以天順初元入內閣言曹石二家必反因得禍戍肅州夫人實從居五年宥還京師憲宗即祚翁被召復為修撰出知興化府夫人留京師翁

既致政當成化壬辰卒後二十年夫人壽七十有二乃卒蓋公素篤孝友夫人志協力相不遺其憂翁竭節盡職不復顧私夫人貴不外溢處難不內懟翁重義博愛卹人之孤拯人之急日汲汲不暇夫人惟所命猶恐弗給若恒事常職未嘗畧有德色及孀居處獨拮据掇葺矻矻終其身而門闕屹立聲望不墜居常談翁所履歷及閨閩間語皆慷慨激烈使人興起非負丈夫器識者殆不及此故公卿舊故多致盡敬里黨諸子皆有所倣

法焉夫人其賢哉夫人生子四人俱殤女六人某某內
德娶歸東陽為繼室為外孫者一惟東陽之子兆先而
已嗚呼吾妻之亡兆先生甫四月夫人間謂東陽曰吾
欲見吾外孫之有婦也乃聘於吾友潘君時中之仲女
夫人實相成之東陽繫朝籍不及赴葬遣兆先執紼行
以某日葬夫人以編修貴被封曰孺人今稱夫人致私
敬也銘曰婦德不必同惟厥從福履不必隆惟厥終厥
終伊何壽則希有厥從伊何名以不朽嗚呼天子竟何咎

封太安人楊母張氏墓誌銘

東陽與楊應寧為知己二十年獲拜其母太安人數矣
應寧為按察司僉事提學山西太安人卒於官邱應寧
書來徵銘曰一清俟此以葬因屬其門人禮部主事喬
寄為狀翰林庶吉士閻价華繼刻石京師寓而歸先公
之喪應寧方以書弔我慰我今遽有是託子復惡能無
情哉按太安人姓張氏大父為湖廣九溪衛安福所官
世居澧州太安人時為處子方少閑內則應寧先公娶

張繼劉皆早世念嘗為澧州判官聞太安人家範甚習

乃繼聘焉及歸劉安人遺女甫晬病幾死親提抱同卧

起求良醫善藥而愈之公自厲為清白吏佐以勤儉及

同知化州從居十年服飾皆嫁時物處同輩金綺炫赫

中晏如也州有劇寇城且陷僚屬家皆襁兒女為走計

太安人遣人覘公方乘城治戰具曰無憂也治家事如

常時諸家恒視以為重卒無他變公本雲南人既謝官

占籍巴陵太安人脫簪珥易布粟以為日應寧應竒童

薦奉公及太安人上京師及承詔讀書翰林舉進士公
始棄養後拜官中書舍人三載考最例得給公勅命進
階儒林郎太安人封六品號從夫貴也應寧滿九載待
次疏乞歸雲南省祖墓留太安人居鎮江既修祠合族
還始置田買屋宇為常業太夫人實指畫之應寧得山
西命重勞起居欲乞終養太安人不許許就養至則體
不通應寧不敢數出巡太安人輒使行至平陽得病報
馳還太安人遂不起是為弘治戊申五月二十五日壽

六十有三太安人敦重簡言笑祀事必恪禮處姻族馭臧獲無疾言怒色慈而能教京曹賓友以應寧故造訪踵接必豐饋食或聞應寧飲笑過度必婉語戒之山西學政久弛應寧力劾宿弊有無賴子挾勢撓抗索治之幾斃杖下太安人聞之愀然曰法固當爾顧人命亦至重爾父嘗言刑曹務平恕竟爾忘之耶應寧之文行一時樹立卓卓雖出父訓亦太安人教也初同知公病革念不能歸雲南巴陵僅係空籍而劉安人女適鎮江胡

宗胤擬卜居鄰未果太安人實命應寧葬於鎮江丹徒
大山支之原始占縣籍茲以九月六日啟窆而祔又嘗
念應寧壯未有子命以雲南族兄續次子紹芳告公祠
堂為冢嗣此二事皆功於楊氏故特誌之銘曰孤城岌
岌桴鼓親執我從夫者以死殉急翼翼重闈命服有儀
非子斯才孰我克馳我相夫勤誨子以慈而饗厥終孰
謂弗宜其饗幾何勤則多有我廉其取以遺我後九原
有知不我心負孰能我銘吾子之友

明故廣西布政司副理問致仕葉公墓誌銘

吳江地多水坎不能葬者必築甃石冢於其上其工累數千百計凶事既不豫事多至倉猝不克固以為常患味蓴葉公既老自營壽歲曰吾得從司空圖游足矣乃相吉壤於殿宇圍之原方事封築未竟而卒其子紳益築之踰年而後舉成先志也公諱芳字子春世居吳江之汾湖湖多蓴公姓所嗜故以為號焉大父仲賓九江府倉大使父蕙母鄭氏公性篤而敏善記誦尤工屬

對習詩經舉子業為縣學生御史彭公勗孫公鼎督學

政每試必置優等試鄉闈屢科不利以年當貢同學有

徐文玉者母年老遂讓之又二年乃貢禮部入國監以

例歸寧時怙恃既失與其配居刻屬為業又十有五年

授廣西布政司副理問志存公恕賀縣卒四人樵於谷

皆坐淫罪久不決公疑之廉得實止罪其二二人獲免

時稱為明當川民林姓者以荒歲轉徙其田為富民所

業比歸不克復他官言田久無主非富民存之亦為他

人有矣公獨謂田本林產今其主故在惡得言無乃取其大半歸之富民以白金賂公欲盡得田公叱不聽在官幾九載無公私過藉以老乞歸巡撫都御史朱公英素善器使不輒聽懇乃得釋居家教禮義雖底富盛二子皆登科籍恒歆然不以驕人鄰有為不孝者呼而切戒之卒自感化鄉人稱之公年七十有六生某卒某卜葬某子四紳其長舉於丁未進士為戶科給事中有名孫七公夙勤子教念嘗誣於科目欲償取於後及見其

子之成曰吾不憾矣今天子即阼紳奉使南服期得歸
覲弗及歛例復命於朝乃返襄事因奉狀請予銘且自
述其葬地始末如此給事中例有封勅必滿三載始得
拜姑銘此以俟諸他日銘曰汾湖葉公古達者年未髦
期巡於野後十年餘葬茲土身所自營非手假生怡死
安此其所生有令名沒不腐樵牧之輩安敢侮

明故南京工部尚書劉公墓誌銘

公姓劉氏諱宣字紹和一字應召其先世家南昌有諱

君造者任南昌為吉州推官始留居安福祖諱尚勤考諱祖昭俱贈太常少卿公八歲而孤長值家難力就學受春秋於禮部侍郎李公紹正統丁邗補父戍盧龍徒步學京師冬無纊手足皸裂忽凍死道上有老嫗飲以羹始甦夏嘗中暍有遮夫以熱土覆臍摘園瓜食之乃復進己已北使假貢獻圖窺伺公上疏言不可信宜豫為備後六師失利公從武官守天津密贊戎事或誘之逃或留妻以女皆弗聽事定乃返景泰庚午例得校藝

京闈巡撫都御史鄒公來學竒公才曰子必為解元聞者皆笑比試公果登第一名頓起辛未會試第九舉第二甲進士簡入翰林為庶吉士壬申授編修癸酉代祀北鎮丙子修寰宇通志成遷修撰天順戊寅歸省母彭淑人迎養於官庚辰同考會試壬午典京闈鄉試人服其公甲申憲宗即祚命充經筵講官丁亥九載秩滿擢春坊右諭德尋以英宗實錄成遷右庶子庚寅擢南京太常寺少卿上疏請增置太廟寶座更造進鮮服定樂

舞生名數圖畫功臣諸廟數事多見采納丙申丁母憂
己亥還任壬寅進本寺卿兼掌國子監事修正條教卹
病賻死士類咸悅服琉球國遣子弟就學公據例請給
薪米衣服撫之加厚學者奉束修金公辭弗受丙午召
入為吏部右侍郎學者復申前請事聞命公受之公在
吏部每留意人才政務畢舉丁未早代祀北岳北鎮祀
畢而雨弘治戊申今上皇帝特進左侍郎庚戌進南京
工部尚書剗姦弊稽出納償官逋數千而羨倍之辛亥

某月卒壽六十七公事母孝待寡嫂以禮鞠兄女有恩性耿直好折人過人亦以此重之尤熟本朝典故能歷數公侯世系成化初禮議慶成宴坐尚書姚公夔詢公公歷舉舊制某官坐某所姚據以上奏行之至今為文務理勝所著有冲澹集藏於家配王氏累封淑人子三長秉常以公蔭為國子生次某某月日葬上遣官治葬弔且賜祭云東陽公京闈所舉士也故秉常來乞銘東陽其忍銘公亦何敢不銘銘曰六卿分職兩曹並舉

公居南曹實掌邦土天子曰咨作我肱股乃身在外心
實予輔諸吏奉法羣工信度天子曰都是咸在汝公在
吏曹為衡為權公在大學有身有言文為國華公在詞
垣由終遡初亦罔不賢天之培之以歲以年國有耆舊
若龜筮然胡生之艱而弗其延我叙公行揚幽賁玄誥
命有章諭祭有文君恩在茲過者式焉

懷麓堂集卷四十九



總校官庶吉士 臣張能照

校對官庶吉士 臣徐如澍

膳錄監生 臣魏 鎔

財團
佛陀教育基金會
釋淨空
敬贈

